

այսպես յայտնի իբրեւ զանհաւատ արհամարհանաւք առ ոտն հարկանէ զսրբութիւնն եւ աներկիւղ կամակարութեամբ գործէ զաղտեղի գիծութիւնս»:

5 Եւ լուեալ զայսպիսի բանս սրբոյ¹ քահանայապետին Հայոց Սահակայ ի նախարարացն Հայոց՝ պատասխանի տուեալ ասէ. «Իբրեւ ոչ եթէ նոր ինչ լսելով այսաւր ի ձեռք, ճանաչեմ զասացեալսդ ձեր. արդ գիտեմ, զի զկծեալ սրտիւք խաւսիք զայսպիսի խաւսս: 6 Եւ ինձ անհնար է ասել, եթէ այլաբանք ինչ եւ ոչ ստուգութեամբ պատմին ասացեալքդ ի ձեռք. բայց արդ՝ ո՛րպիսի հնարիւք ըստ արժանի հոգեւոր մարդկան պարտ է զելս իրացդ գտանել՝ զայն արժան է խորհել ամենեցուն եւ առնել»:

7 Եւ նոցա առ հասարակ պատասխանի տուեալ ասեն ցտւորք կաթողիկոսն Սահակ, թէ «Մեք եւ ոչ մի ինչ ելս այլ եւ հնարս իրացն գտանել կարող եմք, բայց բողոքել թագաւորին Պարսից՝ ի բաց բառնալ ի թագաւորութենէ այտի², որում ինքն իսկ ինքեամբ չեղել արժանի ժառանգելոյ. այլ մեզ քան զայդ ո՛չ իմանալ ինչ է եւ ոչ առնել: 8 Այլ զքեզ աղաչեմք միաբանել այսմ խորհրդոյ մեզ. եւ չէ պարտ³ այսպիսի անսրբութեանց այլ եւ պղծութեանց⁴ գործոյ թագաւորին հաղորդ լինել»:

9 Իսկ սուրբ հոգեւոր կաթողիկոսն Հայոց Սահակ, իբրեւ լսեր զայս ամենայն ի նախարարացն Հայոց, եւ ստուգիւ ճանաչեր, եթէ ի նոյն միտս եւ ի նոյն խորհուրդս հաստատեալ են բովանդակ աւագանի աշխարհին՝ ի մեծ տրտմութիւն եւ յանմխիթար սուգ⁵ ընկղմեալ լինէր. եւ հեղեալ արտասուաց վտակս առաջի բազմութեան նախարարացն Հայոց՝ հրաժարեր առնել պատասխանի բանիցն մինչեւ յաւուրս բազումս: 10 Եւ արգելեալ զինքն ի սենեակ՝ ողբոց միայն եւ արտասուաց լսէին ձայնս, մերձեալ ի դուրս սենեկին. քանզի տեսանող ականք ի զաւրութենէ⁶ սուրբ Հոգւոյն տեսանէր այրն Աստուծոյ ի սպառ ի սպառ զկործանումն աշխարհիս Հայոց: 11 Իսկ յետ բազում աւուրց համարձակեալ ոմանք յեպիսկոպոսաց, որք հանապազ պարապէին առ դուրս սրբոյն,- չկարացեալք եւ առ վայր մի տեսել⁷ յառատաբուղիս⁸ եւ ի շնորհալից վարդապետութենէ առնն, որ *քաղցր էր ի ճաշակելիս*

1 ՏՏ. սուրբ

2 Ատ. այդի

3 Գտ. եւ ոչ պարտ

4 Ձ. սրբութեան խորհել զայլ, եւ պղծութեանց

5 Ձ. սուք

6 ՏՏ. եւ ի զօրութենէ

7 Գտ. առ վայր տեսել

8 Ձ. յառատաբուղիս